

東
華
續
錄

東華續錄

同治八十九

臣王先謙敬編

臣張式恭恭校

同治十年辛未春正月辛卯朔元旦節停止筵宴○壬辰諭軍機大臣等定安金順奏攻克王瞳賊巢殲除首逆一摺河西王瞳賊巢壘堅賊悍經金順會同張曜督飭將士奮勇進攻疊敗援賊茲復於上年十二月十三日攻克堅巢先後殲斃逆酋多名悍賊八九千名於天寒餉絀之時建此偉績甚屬可嘉王瞳已下其河西附近各堡自應乘勝進攻著金順會商張曜分軍扼紮要隘一面調治受傷士卒整理器械先行籌辦東北各堡節節掃蕩至通昌通貴各堡前據左宗棠奏馬化澂投降後籌辦撫局並著金順隨時咨商左宗棠如該堡回眾陽奉陰違仍著該署將軍督兵進剿

毋稍遲回致墮奸計見在甯靈一帶已無陝回蹤迹所有招集流亡拊循瘡痍一切善後事宜必須實心任事之員認真經理甯夏道府州縣各官能否勝任著左宗棠隨時訪察並遴賢能守令將地方應辦事務悉心籌畫止分良莠不問漢回務令彼此相安毋任尋仇啟釁左宗棠前奏余彥祿一股已繳械投誠余彥祿亦受傷垂斃並著左宗棠飭令劉錦棠等妥籌安插毋令餘燼復燃余彥祿刻下究在何處著卽查明具奏甘省北路軍務得手恐敗逃餘匪乘隙四竄或西竄甘涼或北出邊外著左宗棠穆圖善派兵分投截剿並著定安督飭纏金磴口各軍嚴密偵探遇賊卽擊毋稍鬆勁將此由六百里各諭令知之○予陣亡總兵官賈蕙山等祭葬世職建祠○甲午廣浙江江山縣學額二名○乙未諭內閣曾璧光奏官軍剿平貴定等處賊巢攻克都勻府城一摺貴州苗

逆金幹幹等占踞都勻府城經署提督劉士奇等分軍三路節節進攻平毀賊巢多處斬擒悍賊多名遂於上年十一月初九日將府城克復勦辦尙爲得手前署貴州提督古州鎮總兵劉士奇督軍攻勦克拔堅城實屬奮勇可嘉著賞換額騰依巴圖魯名號仍交部從優議敘其在事尤爲出力之提督林從太著賞穿黃馬褂總兵何雄輝著以提督記名簡放並賞穿黃馬褂吳占勝賞加提督銜並賞給信勇巴圖魯名號○諭軍機大臣等曾璧光奏官軍勦平貴定等處賊巢攻克都勻府城丁日昌捐助軍火各摺片都勻府城爲省城至苗疆最要門戶前因羊安各營飢潰以致得而復失茲經劉士奇等督軍進攻疊破賊巢遂將該城克復勦辦尙爲得手逆首金幹幹見逃何處未經聲敘刻下軍勢旣振自當乘勝進勦節節掃蕩雖都郡屢爲賊踞此次旣經克復必須妥籌善

後加意防守不可再有疏失前據曾璧光奏擬令周達武馳赴下游與席寶田籌商或進規凱里或由重安南渡與楚軍夾擊旋據周達武及崇實吳棠先後陳奏均擬先清上游股匪改從都勻進兵朝廷雖不爲遙制而彼此意見參差未歸一是必致貽誤事機會璧光身任封圻應和衷商辦以策萬全見在都勻已復楚軍亦攻克台拱軍情旦夕變遷究應如何進兵之處著曾璧光悉心籌商奏明辦理嗣後遇有該省軍務仍著會銜具奏至黔省軍務辦理日久總未大加振作此時事機稍覺順手卽當力籌攻剿務將該省賊匪限於本年一律廓清不得稍涉延緩該省餉需未能充裕著該撫設法嚴催如各省遲延不解卽行參奏並著戶部將協黔各省餉項嚴催速解以裕兵食江蘇巡撫丁日昌捐助軍火力顧大局該撫見已丁憂開缺矣另片奏保剿賊出力之已革各員

內已革知府車尙賢聞其貪緣教士簸弄是非此等劣員豈得濫行保奏所請著不准行又另片奏密陳已革道員多文結案微勞等語多文係永不敘用之員且經教士胡縛理代請優獎其爲鑽營教士以圖進身顯而易見實屬卑鄙無恥著不准其保獎將此由六百里諭知曾璧光並傳諭周達武知之○予貴州陣亡副將張接喜等祭葬世職○丁酉子湖北陣亡署崇陽縣知縣鈕芳津等建祠○戊戌以孟春時享 太廟 上前期親詣行禮○諭軍機大臣等左宗棠穆圖善奏回匪竄擾肅甘郡縣左宗棠豫師奏賊犯礮伯擊退情形各一摺賊於十月初九日竄入山丹縣城旋即退竄大股直逼甘郡擾及高臺復有另股盤踞鎮番縣屬之柳林湖西甯地方又有陝回竄擾此時甘省北路軍務正在得手賊黨乘西路空虛紛紛肆擾雖經楊占鼐王仁和隨時防禦尙恐兵

力不足著左宗棠穆圖善迅速會商派撥勁旅分紮扼要處所嚴密堵剿毋任賊蹤紛竄其柳林湖踞匪著穆圖善飭令常明率隊進剿悉數殲除河狄回匪出擾近省一帶經副將王得隆帶隊迎剿疊有斬擒仍著穆圖善妥爲布置認真防範署山丹縣知縣張東恬因公出城有無捏飾著左宗棠穆圖善查明具奏撲犯碾伯之賊經參將李春海等督率團勇擊退據獲賊供稱有由甘涼出口之語左宗棠穆圖善務當於沿邊一帶設法防守不得任令竄出邊外致滋蔓延並知照成祿趕緊派隊兜剿以期聚殲豫師卽督飭李春海等實力防剿一面相機前進馳赴本任會同黃武賢妥爲籌辦此次擊退撲犯碾伯賊匪在事出力各員准由左宗棠豫師擇尤保奏將此由六百里各諭令知之○諭劉崑奏援黔各軍攻克台水等寨見在剿辦情形一摺席寶田一軍攻克台水等

蔡戈鑑一軍攻克九節等寨並追擊鼠匪節節獲勝勦辦尙爲得手此次出力文武員弁著准其歸克復台拱案內彙請獎勵見在雞擺尾猶煩兵力凱里逆酋亦負隅抗拒席寶田已約戈鑑會攻雞擺尾擬俟該處克復後以次進取高坡凱里俾悍酋巢窟悉由楚軍一律鏟除洵屬勇於任事卽著劉岷檄飭席寶田戈鑑等軍實力進攻由雞擺尾掃蕩而前迅殲醜類昨因曾璧光周達武先後陳奏進兵之路彼此意見參差深恐貽誤戎機諭令該撫等將如何進兵之處會商具奏刻下湘軍進勦苗疆事機順利黔省各軍亟應商定進兵之路分投勦辦庶可通力合作以期次第廓清其上斬下斬韶雞甲交被巫度交等寨及烏連九連康中烏亥斬衣大田角白韜斬岡董畹九寨先後詣營乞撫劉岷務當飭令席寶田戈鑑妥爲安插毋令再生反側致滋事端將此由六百里諭

知劉崐曾璧光並傳諭周達武知之○己亥諭軍機大臣等據錦
丕勒多爾濟奏上年回匪侵犯烏城福濟並不先事豫防及該城
失陷眾皆被害惟福濟得以保全該將軍日夜與賊同居止顧身
命將倉庫存項酬謝賊匪所奏賊情語多含混又於厄魯特人眾
搶擄驛站牲畜財物並不究辦張廷岳防剿喀爾喀竄匪時福濟
將奏調綏遠城等處兵丁皆令停止見在被擾地方並不設法撫
恤又給回兵常安子頂帶使之作爲通事任其騷擾蒙古殺害蒙
民五人皆置之不理等語前因烏里雅蘇台被賊竄陷該城兵力
甚卑勢難堵禦尙屬可原業經降旨將福濟等革職畱任以觀後
效茲據錦丕勒多爾濟所參福濟謬妄貽誤各節是否實有其事
著奎昌馳赴烏城會同榮全逐款查明據實具奏將此由五百里
各諭令知之○庚子諭軍機大臣等劉嶽昭岑毓英奏官軍攻克

竹園賊巢岑毓英奏圍攻潞江情形及降人蔡廷棟攜眷私逃各摺片滇省彌勒縣屬竹園地方被賊久踞經總兵張保和等會師進剿連破上坝下坝逆巢多座擒斬館驛等處援賊甚多立拔竹園老巢剿辦甚爲得手竹園地當衝要見雖克復而館驛等處賊匪尙未掃蕩該督等見檄張保和署理開化鎮篆著卽飭令迅速赴任督率該處兵團乘此聲威將田心茂克江那里曰者鄉各處賊匪相機分別剿撫早靖東南以便全軍西上合圍大理岑毓英已馳赴潞江攻克附近賊營多座見擬開挖地道進攻著卽督飭各營迅拔堅城毋稍鬆勁見在雲南軍務日有起色未經收復地方尙有若干各路帶兵將弁某員剿辦何處均著繪圖貼說詳細奏聞蔡廷棟攜眷私逃是否仍回大理馬如龍係派何員看管有無通同情弊著一併查明具奏將此由五百里各諭令知之○諭

蘇鳳文馮子材奏遵查越南夷匪滋事情形蘇鳳文奏官軍剿匪
獲勝各摺片此次越南匪徒蘇幙漢劉永福鄧志雄等尚在該國
墾田授職俱非吳亞終之黨見因越南夷官辦理失宜致令羣起
爲難其匪首曾亞治原係越南積匪又與各匪勾結煽亂夷地白
苗復伺隙擾害該國兵力單弱戡定爲難必應派兵應援以示矜
恤小邦之意况諒山木馬均距廣西邊境非遙尤應妥籌防剿以
捍疆圉卽著馮子材剋日馳赴太平統率派出各營相機進剿迅
掃賊氛思陵土州等處賊匪見經署知府徐延旭派兵剿捕漸次
清釐卽飭團練往襲蘇幙漢坤光老巢疊挫賊鋒著蘇鳳文飭徐
延旭會商夷兵乘勝夾擊以收事半功倍之效白苗巢穴距鎮安
所屬邊境不遠仍著蘇鳳文馮子材飭令在防各軍實力堵扼毋
稍鬆勁李福泰已由廣東啟程該撫接受署篆後所有一切軍情

均著與馮子材妥愼籌辦以副委任將此由五百里各諭令知之
○予雲南陣亡參將劉自馨等祭葬世職○壬寅諭內閣大學士
官文持躬端謹器量恢宏歷承先朝知遇由寺衛游升將軍蒙
文宗顯皇帝優加擢用補授湖廣總督簡任綸扉特命爲欽差
大臣督辦軍務與原任湖北巡撫胡林翼協力同心和衷共濟肅
清全楚復籌辦東征軍務接濟餉需不分畛域厥功尤多金陵之
捷加恩賞給一等果威伯並將其本支擡入正白旗嗣令來京供
職總理部旗事務旋署直隸總督數歷中外久著勤勞方冀克享
遐齡長資倚畀迺以偶染微疴遽爾溘逝遺章披覽軫惜殊深著
賞給陀羅經被派惠郡王奕訢帶領侍衛十員卽日前往奠醊加
恩晉贈太保照大學士例賜卹入祀賢良祠賞給廣儲司銀二千
五百兩治喪任內一切處分悉予開復應得卹典該衙門察例具

奏其一等伯爵著俟伊子榮綵百日孝滿後由該旗帶領引見承襲毋庸俟年終辦理用示篤眷蓋臣至意尋予祭葬諡文恭○丙午諭軍機大臣等文麟景廉奏科城咨請援兵暨關外東西各路喫緊情形各摺片文麟等前接科布多咨文調軍赴援業已部署一切由景廉督兵前進自因該處軍情緊急起見惟烏里雅蘇台之賊早經退竄且已調派察哈爾等處馬隊前往防剿刻下烏科一帶情形較鬆景廉卽著毋庸帶兵前往第安集延回眾攻破吐魯番城另築新城二座並有往攻圍烏魯木齊之信該回眾恃強攻擊並無歸順之意情殊叵測必須先事籌防著文麟景廉督飭兵勇於西路各要隘嚴密扼守加意防範以杜窺伺肅州西甯河州碾伯等處回匪紛竄出關玉門一帶漸有賊蹤若不設法截剿必致絡繹西竄愈聚愈多成祿所派之李天和等三營見紮玉門

燉煌二縣著卽飭令認真巡防遇有口內竄出之賊隨時堵截其肅州一帶竄匪成祿仍當實力剿捕毋得任令接踵西趨愈形滋蔓甘肅甯靈一帶回匪既經分別剿撫辦有頭緒左宗棠務當統籌全局派撥勁旅將西竄之賊分頭兜剿免致逋逃口外又成不了之局並著文麟景廉嚴飭東路防兵勤加偵探遇賊卽擊毋稍疏懈文麟等所奏委員許登科趙德鈺等採辦駝隻布匹等項均在烏城被賊搶去是否實有其事著福濟等查明咨照文麟等辦理將此由六百里各諭令知之○陝西巡撫蔣志章奏北山逐漸肅清見仍加意防範得旨著檄各路防軍會同劉銘傳各隊認真防堵毋稍大意一面仍搜剿北山餘匪務絕根株並飭地方官將應辦各事宜悉心經理以靖閭閻○丁未沈葆楨懇辭船政不許○命張廷岳等撥兵赴科布多協防○己酉諭軍機大臣等曾國

藩奏河運艱難應設法豫籌一摺據稱江北冬漕見遵部議仍辦河運惟運道艱難豫籌應辦事宜五條請飭令分投興辦等語漕船經過山東境界計一千數百里中多阻滯以致挽運艱難亟應先事圖維免蹈上年覆轍曾國藩所陳應辦事宜五端關繫河工漕務實因時制宜之策丁寶楨勇於任事必能力任其難著卽按照曾國藩所奏督率沿河各州縣實力修濬次第興工以期一勞永逸至張兆棟管理漕務蘇廷魁總轄全河尤當悉心商酌通盤籌畫將曾國藩所陳開挖河道及略改舊章渡黃改道各節迅速會商丁寶楨實力興辦毋得稍存推諉原摺均著鈔給閱看將此各諭令知之○庚戌廣山東武城縣學額五名○辛亥諭軍機大臣等蘇鳳文奏會剿夷境賊匪俟越南咨覆再行酌辦及請給發米價腳費各等語前因越南匪徒滋擾諒山等處當經諭令蘇鳳

文等派兵援剿見據該夷官來咨諒山匪徒就撫自可無煩兵力其木馬等處另股賊匪既據奏稱應如該夷官所請由該國王商定再辦卽著蘇鳳文李福泰馮子材俟越南來咨再行辦理至越南應領米價腳費自應給發歸款雖據越南國王咨稱不敢具領然此係該國應領之款著蘇鳳文等飭令太平府知府知照該國將前寄北庫銀三萬八千餘兩仍截存夷庫以示體恤將此由四百里各諭令知之○諭劉嶽昭岑毓英奏川邊蠻匪竄擾滇境調兵剿辦一摺雲南昭通屬之永善縣緊連川界與雷屏山廳縣所屬各蠻僅隔金沙一江見因蠻地飢荒江水低落以致該匪偷渡過江襲踞防兵營碉數座並攻破求雨堡擾至黃果溪出水洞燕家寨一帶勢甚猖獗永善縣城戒嚴劉嶽昭等已調副將劉奇義抽帶勁勇三百名馳往該處聽候總兵李家福調遣以期迅殄賊

氛惟大關一帶爲迤東孔道且井渡釐金必由之路一綫餉源關係緊要著劉嶽昭岑毓英一面督飭李家福等剋日進剿一面酌量添撥勁旅以厚兵力庶可盡殲醜類毋致蔓延此次該匪傾巢出擾半多蟻聚川岸若川軍同時並舉則未渡各匪必當迅回老巢而入滇蠻眾不難撲滅著崇實吳棠飛飭雷波屏山附近兵練併力夾擊毋稍玩延將此由五百里各諭令知之○癸丑諭軍機大臣等崇實曾璧光奏黔省教案仍照原議歸結一摺黔省教案九起經在事各員與教士李萬美等商議妥協一律議結並由該教士出具甘結照會銷案是民教兩面各無異詞實有完案確據此後遇有中外交涉事件曾璧光務當督飭地方官秉公持平辦理以期永遠相安在事出力之道員余思樞著賞加布政使銜知府馬應鏗著賞加三品銜同知張鴻績著賞加鹽運使銜州同湯

中著俟補缺後以知州用章紹濱著不論雙單月選用副貢生華國輝著賞給五品銜前署遵義府知府汪炳璈前署遵義縣知縣劉肇觀前署遵義協副將梁正春於民教倉卒滋事未能卽時解散實難辭咎均著交部議處外委范玉芳把總陳雲龍著一併斥革前署永甯州知州尹樹棠著摘去頂帶一年無過方准開復前署綏陽縣知縣楊嘉禾前署獨山州知州錢壘前署桐梓縣知縣耿光祺均著交部察議以示勸懲至賠款銀七萬兩已由黔省籌發三千兩其餘六萬七千兩崇實等分咨各省於協黔軍餉內劃撥固因黔省餉需支絀無可應付惟與其令該教士自行走領不如由川省先行籌款墊發一面咨催各省於協黔餉內照數提出解還四川較爲直捷著崇實吳棠曾璧光斟酌情形設法籌辦將此由五百里各諭令知之○乙卯諭軍機大臣等左宗棠穆圖善

奏分剿竄回獲勝並西路不遑兼顧各摺片西路柳林湖等處賊匪經馬隊連日進剿獲勝東路傅家山等處復經馬步官兵疊次擊敗賊匪並護餉到省著左宗棠穆圖善卽飭派出各軍分路掃蕩毋任蔓延惟敗賊圖竄西甯米拉溝亟應妥籌防範並著檄令西路各軍嚴密布置遇賊卽擊迅掃逆氛成祿一軍前據左宗棠奏毋庸出關卽在肅州駐紮與提督楊占鼐會辦一切當諭令成祿就近兼顧肅州與楊占鼐會同擊賊惟沿邊各口賊匪處處可竄成祿等所部未足深恃仍著左宗棠穆圖善隨時酌度情形妥籌兼顧馬化澂投誠後本堡馬械是否呈繳牆垣是否平毀河西等堡及河州西甯等處賊匪見在如何籌辦王家疇莊已於上年十二月攻克馬化澂等黨眾仍應懍遵前旨辦理著該大臣迅速詳細具奏將此由五百里各諭令知之○以文煜兼署閩浙總督

○丁巳諭軍機大臣等福濟奏逆匪復圖回竄請飭催馬隊並擬調員辦理口外轉運各摺片回匪去來靡常既有正二月間復來搶掠官廠分撲庫倫之說並有平羅銅城堡逆匪勾結陝回千餘攜帶半月口糧以圖北竄等語自應厚集兵力藉資防剿著文盛杜嘎爾督催吉林黑龍江馬隊接踵前進毋稍逗畱杜嘎爾擬於二月初五日啟程著卽將應辦各事宜趕緊料理早日成行不得再有濡滯至達爾濟馬隊據文盛奏見已行過賽爾烏蘇是該總管尙無退縮遷延情弊福濟等請將達爾濟先行交部議處之處著加恩寬免文盛等仍當飭令迅速西行探明賊蹤相機迎剿推河至烏臺站福濟等總當懷遵疊次諭旨豫備周妥俾利師行不得以援師毋庸赴烏爲詞遂置臺站於不問錦丕勒多爾濟已回烏城尤當將蒙古各站極力整頓毋許推諉總之臺站不復惟福

濟等是問援兵逗留惟帶兵各員及文盛等是問該將軍等當同心協力共靖邊陲毋自貽伊戚也匪徒既有正二月閒圖撲庫倫之信文盛當迅催宣大官兵趕緊赴庫並知照張廷岳等派員迎提沿途照料福濟等擬令馬隊援兵均至哈爾尼敦額爾德呢招推河一帶會合探剿於地勢軍情是否相宜著杜嘎爾行抵該處會商籌畫總期於近剿轉運各事均無窒礙卽行照議辦理朝廷亦不爲遙制也福濟等片稱推河爲往來衝道未便安設糧臺霍呢齊地尙適中擬添設轉運糧臺請飭口北道隨帶委員並張家口見存烏城餉項迅到霍呢齊辦理接運酌撥貢果爾馬隊護守糧臺等語著李鴻章卽飭口北道前往辦理如該道未能分身卽由李鴻章何璟各派得力道府迅卽出口接辦以期無誤要需將此由六百里各諭令知之○戊午諭軍機大臣等奎昌等奏景廉

無須赴援布彥鄂勒哲依圖呈懇催兵一摺前據文麟等奏科布多咨調援軍已部署一切由景廉督兵前進當諭知該辦事大臣等烏科一帶情形較鬆景廉毋庸帶兵前往科城人情浮動亟須勁旅彈壓業諭張廷岳等於前調宣化大同兩鎮官兵二千名到庫後卽各撥五百名赴科防守惟此項官兵到尙需時著奎昌文碩先就見有兵力嚴密布置不可稍有疏虞至布彥鄂勒哲依圖以安集延頭人帕夏率眾攻拔吐魯番見欲攻烏魯木齊心懷叵測恐游牧復遭蹂躪懇請催兵救援見在大兵未到應如何先行設法羈縻妥爲撫輯之處著福濟奎昌文碩悉心會商妥籌辦理將此由五百里各諭令知之○諭奎昌文碩奏撫馭災黎情形一摺綏來縣民人軍功趙興體等於該縣失守後率眾避居沙子山等處能於流離困苦之餘團練殺賊將呼圖壁城攻克實屬奮勇

可嘉奎昌等既經發給牛具銀兩以示體恤仍著隨時派委委員前往曉諭俾該民人等知所感激藉資臂助軍功趙興體董率有方著賞給守備銜並賞戴花翎以示鼓勵其攻克呼圖壁城出力之人卽著咨商文麟等會同查明保奏李昶亦著歸入前案出力人員內一併請獎新疆各城自被回匪攻陷以來朝廷因內地軍務未平遽難勤兵於遠每念該處民人慘遭荼毒實堪矜憫見在趙興體等民團既有千餘名河西又有鄉約劉姓民團四百餘人距烏魯木齊九十里之南山有徐學功民團五千餘名奇台古城兩處有鄧玉生民團七八百名是各處民情皆能忠勇奮發踴躍從公正可加之激勵俾遂報效之忱著左宗棠酌量情形或遴派賢能明幹之員輕騎出關或卽飭口外鎮道各員將該處民人妥爲安撫以期眾志成城漸奏廓清之效惟所派之員必擇實心任

無稍寬濫該逆陸續呈繳金銀銅錢三項共合銀十九萬兩有奇除分賞前敵馬步七十一營每營二千兩老湘一軍在事最久出力最多酌量加給外餘銀提爲遷居靈州張家圈之王洪堡馬家河灘各回民購辦賑糧及水入堡修復渠工中衛採買麥種之用又奏陝回窘蹙就撫據劉錦棠雷正綰黃鼎等分起押解陳林一起男婦大小一千五百六十四名口馬振江一起男婦大小八百四十八名口赫青選一起三百八十三名口馬化瀾一起一千二百七十八名口余彥祿閻興春余兆臨拜萬江金明堂安傑等各起男婦大小五千五百五十餘名口內除挑出壯丁四百名交安傑藍明太帶隨官軍征剿外餘俱陸續解赴平涼其老幼婦女無親屬夫男者五百七十餘口病臥不能行走畱養廣武營聽其痊愈擇配沿途除病斃外復收集從前散匪東西兩山餘眾五百餘

名口比齊抵平涼臣兩次親臨點驗實共一萬有奇內除前安插平涼回民認領親眷五百餘名口外實發化平川安插者男女共九千四百餘名口察看丁壯不過二千餘皆老弱疲病而已化平川地在華亭縣西北一百七十餘里東南距平涼百里南連崆峒西北均阻高阜巖壑環峙雨水縈繞一爲化平川一爲聖女川合流入白面河入清水縣界中橫寬五六里長三十餘里似亦前代安置降人之地顧其詳不可得知臣前委記名道馮邦棟前往相度改聖女川爲聖諭川爲宣講之所白面河曰北面河示拱極之義飭千總牟春陽帶土勇二百四十名分紮關山三才鎮各口調記名總鎮喻勝榮帶所部平江營扼紮化平鎮以司稽查馮邦棟帶同委員於化平鎮點驗之後按口俵給賑糧丈量地畝按戶分撥房屋窯洞大致定妥購給附近該處土宜種子酌發耕牛騾驢

督其開墾播種察看回眾情形於九死之中得此生路其不敢再萌異志固在意中惟回俗畏所管頭目較之漢民畏官尤甚而彼教誦經祈福之師名爲阿渾又時以異說蠱惑愚蒙爲回俗所信奉以致一夫倡變亂者四起從前道光年間張格爾以回教阿渾和卓構亂者此也按阿渾回教名阿訇訇與洪音近漢民呼爲阿洪今之馬化澀卽新教總阿訇也和卓卽回教所稱教師後裔貴種在阿渾中尤尊明史所稱火者卽和卓之音訛馬化澀署其父墓碑稱爲教父蓋竊和卓貴種之意耳欲變其舊俗同我華風亦非先王不易民而治之理惟於安插伊始於編審戶口中隱寓保甲之意十戶一長百戶一百家長令其鈐束散戶而設官董之凡一切戶婚詞訟均取決焉乃可散回目之勢而以其權歸之官庶幾政令行而統紀壹回民鮮讀孔孟之書故不明其理因而不知

趨向今欲其誦讀服習一從儒教事有難行然臣前奉到聖諭十六條附律易解一書義蘊精深詞旨易曉而大經大法畢具於此上年曾敬謹刊印頒發陝甘各州縣教官朔望宣講令漢回土民有所遵守今復發化平川回民俾知不易其教者朝廷惇大之施不鄙夷其民者聖化覃敷之義長治久安或基於此如蒙俞允添設化平川廳通判化平川營都司則廳屬各員營屬各弁亦應添設容當續行陳明請旨又奏臣前於馬化澂隻身款營得報時卽飭前敵諸軍暫緩其罪勒令先招撫河西王家疰及通昌通貴兩堡蓋以河西各賊巢惟王家疰堡堅黨悍非猛攻所能驟下也旋據劉錦棠稟稱已緘商金順張曜得其復函旋飭馬化澂遣回目馬殿魁前詣河西官軍辦理並據馬化澂稟王家疰內有何家坪悍黨何生洲一股三百數十人助逆請委員同馬殿魁前去

招回到錦棠於十二月初一日遣都司李章貢湯廷幹同馬殿魁
赴王家曠諭知各逆先繳馬械次毀寨牆聽候金將軍張軍門示
遵李章貢湯廷幹於初六日同馬殿魁帶何生洲股眾三百餘人
仍回金積繳馬十二匹擡槍十桿洋槍十七桿小槍九桿刀矛二
百四十餘件其通昌通貴兩堡亦由馬化澂寄信告知金積撫局
已成屬其就撫已有赴河西官軍營盤繳馬者臣於臘月十一日
拜摺後七日接前敵各軍馳報王家曠外垣已於十二日經金張
兩軍乘賊不備踏破塵戰一晝夜復將內牆攻破堡逆概行剿洗
接閱之餘良深幸慰並服其赴機神速能相喻於不言之表也旋
據陳湜稟十二月二十八日夜有通昌通貴陝回男女二百餘名
赴黃鼎營就撫據回目王姓稟稱通昌堡已平毀惟通貴堡尙未
平盡劉錦棠已函詢金順張曜計此時早已蕝事矣其陝回首逆

余彥祿兩腮傷痕潰爛日甚一日已於正月初十日斃於雷正綰營旁空壘其陝回逆目馬正綱已於就撫後跌斃長壕中矣至陝回崔三禹得彥馬生彥等已由涼州西甯折回河州其夥黨冶士俊已於余彥祿股眾就撫時一同就撫解至化平川安插據稱崔禹等逆股眾止四千餘其河州窮回隨同竄走者亦不過數百是西甯涼州所報賊數近萬者不足據見據撫回李德昌稟求赴河州諭撫回眾卽指馬占鼉馬尒大崔禹等逆而言是該逆之急於就撫德昌受其央託已可知臣批准李德昌前往但聽其自投不許招致又奏固原北至金積路出東西兩山之中兩山綿亘數百里最爲藏奸淵藪自進兵以後雖節節埽蕩步步立營然徑路紛歧山谷盤互零匪伏匿其中乘閒劫殺時所不免自應挑土耆回民作爲眼綫探知頭目蹤迹迅起掩之乃期得手疊據記名提督

周紹濂稟報所部左營管帶官總兵李良穆派弁李昭林及回目馬益順王益萬李存昇於上年十月二十九日在羅家要險地方追剿回逆獲勝生擒逆目王金玉管帶旌善頭營都司銜馬柏森在羅山坡一帶剿賊獲勝生擒西山要逆譚生邦丁萬圖馬三寶三犯臣查譚生邦卽金積堡巨逆譚生成之弟王金玉丁萬圖卽正法馬忠海之夥也批飭解營訊決東山賊目李映春卽野賊明起成卽明七十子兩犯係馬化澂死黨李映春爲李旺堡逆目僞號元帥明起成僞號先行前於各疏中曾詳陳之該逆屢經官軍擊敗黨夥散盡而賊首不獲終虞死灰復然適撫回陳聚安探報李映春明起成見匿張家川之瓦窯堡當飭陳聚安會同軍功李德昌密速掩捕明起成就獲而李映春先遁據李良穆報稱十二月十二日派弁同回目李存昇馬益順捕得李映春之黨楊大山

等數名訊知李映春竄至東山卽令楊大山等引導前往掩捕十四日生擒李映春及其子李存英遂提明起成及該犯父子一併梟斬據魏光燾報良回蘇宗保捕獲南八坊逆目馬海奇馬俊並生擒逆回馬捨娃子三犯又署鹽茶廳照磨董麟會同管帶旌善二營良回科進善稟獲逆目馬俊綽號紅套褲一犯訊明斬梟又據周紹濂報稱十二月初十日李存昇擊解要逆楊大娃子查楊大娃子於同治二年穆生花襲陷固原州城時曾帶萬餘人僞號順天王上年隨同馬正和圍攻豫望堡馬正和爲官軍擊斃該逆仍與明七十子合夥肆行劫掠當卽斬決梟示據馬柏森報捕獲王花臺逆賊馬義等十九犯謝家段頭賊目僞元帥王添發及其黨王成幅王虎子台馬四等四要犯批令解營訊決據管帶西征馬隊參將楊正茂報十二月十三日由馬營監護送運省餉項軍

火十四日探得距麻子川十餘里景家口有賊揮隊奮擊斃步賊百餘名生擒十餘名逆目袁和合已斃於陣見查未獲逆目惟狗齒牙子靖遠驛子馬才棕馬母驢閻希孟金添委等數犯業經分飭勒限嚴捕又奏已革前甯夏縣知縣署靈州知州彭慶章久陷賊中爲賊謀王陝甘諸回均稱爲彭阿渾昨經陳湜黃鼎委員押解來營臣親提研訊據供係江蘇松江府人寄籍陝西咸甯縣捐納未入流分發甘肅洊升知縣加捐同知銜問其何時因何案革職據供同治二年前任甯夏將軍慶昫以革員有通回情事奏參有旨交多隆阿熙麟恩麟查辦多將軍時在陝西督辦軍務擬以革職發往黑龍江效力贖罪恩護督未及撤任行查嗣甯夏失守慶將軍復據平羅縣知縣長謙稟訐革員勸其隨回敕恩護督據以入奏奉旨查明如果屬實卽行正法革員不敢回省四年冬穆

將軍收撫甯靈回眾察明冤抑附片奏聞委修渠工復委幫辦靈州善後勸捐嗣後大軍追剿陝回直抵金積馬化澂復叛革員被馬化澂羈留堡中辦事不准放出問在賊中所辦何事據供止辦筆墨除代作求撫稟帖兩次外別未經手問賊中偽官偽局時常交接來往否據供亦曾接見但無交情問馬化澂別處有買賣否據供馬化澂以行教爲重時遣人到各省口岸傳教是有的傳教人叫海裏飛至附本做買賣是其子馬耀邦經手革員不知詳細問馬化澂與洋人有無來往據供金積東關外店鋪多是洋貨東府西府均是花布糊壁生意來往是多的別的不知道問既久在賊中官軍到時何不設法出來據供出來怕殺問何以後又出來據供堡內窮蹙萬分顧不得了察看該犯狡黠異常其通回情罪數年前已經發覺本係奉旨正法之犯就其所供各情通逆最久

實已確鑿不圖蒙面喪心一至於此比卽盡法處死以昭炯戒
上諭內閣左宗棠等奏平毀金積堡賊巢首要各逆伏誅甯靈肅
清出力各員請獎一摺甘肅回逆馬化澂等於同治八年秋間擁
眾復叛盤踞靈州所屬金積堡老巢勾結陝甘各回四出竄擾經
左宗棠派軍分投截剿節節掃蕩並令道員劉錦棠等進搗逆巢
疊將附近賊壘攻破四面鎖圍該逆勢窮乞撫勒令平毀堡寨呈
繳軍械猶敢遷延觀望並於堡內埋藏洋槍洋礮一千餘件匿不
繳出是其心懷叵測怙惡不悛實屬罪無可逭見經劉錦棠等將
首逆馬化澂父子兄弟及逆黨譚生成等概行正法洵足申天討
而快人心見在堡寨一律平毀餘眾分別安插其起獲銀十九萬
兩零除分賞各軍外著左宗棠將所餘銀兩爲遷居靈州之回眾
購辦賑糧俾安生業仍著督飭各軍將各股回匪次第進剿以期

全省廓清陝甘總督一等伯左宗棠運籌決勝調度有方著加恩開復降三級畱任處分並加賞一騎都尉世職甯夏將軍穆圖善陝西巡撫蔣志章協籌防剿均合機宜穆圖善著交部從優議敘蔣志章著交部議敘道員劉錦棠接統湘軍克平巨寇著加恩賞給雲騎尉世職並賞穿黃馬褂所有尤爲出力之道員黃鼎著賞穿黃馬褂提督雷正綰開復革職畱任處分並照一等軍功例從優議敘另片奏已革布政使銜山西按察使陳湜委辦金積堡事宜勞績卓著等語陳湜著開復原官原銜以示鼓勵○諭左宗棠奏安插陝西就撫回眾請增設官員以資鎮撫一摺陝西就撫回眾一萬有奇除該親屬認領外共男女九千四百餘名口均安插華亭縣化平川地方經該督飭令道員馮邦棟前往散給賑糧丈量地畝按戶分撥房屋窯洞並購給籽種酌發耕牛贏驢督其開

呈摺種辦理均屬妥協著該督飭令總兵喻勝榮等妥爲彈壓一面儆飭該地方官加意撫綏毋使失所遇有詞訟案件止分曲直不分漢回總以持平辦理毋任稍滋事端其所請添設化平川通判化平營都司各缺著該部議奏尋議該督因撫馭回眾請添通判都司各缺係爲綏靖地方因時制宜起見應准如所請添設從之○諭左宗棠等奏訊明已革知縣通賊確情盡法懲治等語甘肅已革前甯夏縣知縣署靈州知州彭慶章數年以前已有通回情事嗣復久留賊中爲賊主謀經左宗棠親提研訊據供各情其爲通逆無疑喪心昧良罪無可逭彭慶章業經訊明正法實足以昭炯戒至從逆武弁王錫爵鐵秉忠著左宗棠一併提訊從嚴懲辦○諭軍機大臣等左宗棠奏平毀金積堡賊巢安插陝西撫回李德昌前赴河州諭撫回眾東西兩山捕斬要逆各摺片金積堡

首要各逆馬化澂等均已伏誅甯靈肅清本日已明降諭旨將左宗棠等及出力各員分別加恩獎勵其章合才等十二員統帶湘軍異常出力此次所有勞績著左宗棠先行擬請獎敘仍著該大臣存記俟甘肅全省廓清再行奏請恩施化平川安插陝回各事宜左宗棠所籌均臻周妥惟回俗素畏頭目而誦經祈福之阿渾尤易蠱惑愚蒙著該大臣慎選地方官隨時化導加意拊循務令各安生業以免再滋事端東西兩山及會甯安定等處最易藏奸除已擒斬要逆多名外其未獲逆目狗齒牙子等該大臣卽嚴飭魏光燾等認真搜捕毋任一名漏網李德昌求赴河州諭撫馬占鰲馬尨大及崔禹等逆左宗棠見令李德昌前往但聽其自投不許招致該大臣總當察看該逆等虛實情形穩慎以圖如該逆仍怙惡不悛務當嚴飭各將領乘此軍威進剿河狄西甯各逆巢以

次蕩平毋得一意主撫致爲該逆所紿穆圖善亦當檄飭近省各軍聯絡聲威俾得膚功早奏近聞周開錫在南路剿匪辦理一切輿論未協且與甘省各勇營不相輯睦恐激事端左宗棠當隨時查察不可信任過專致誤事機見在鞏秦各屬有無大股賊匪北路旣已肅清該大臣應進紮何處抑赴省垣居中調度如統師前進後路尤當妥爲布置並著蔣志章會商劉銘傳將陝甘毗連各要隘嚴密扼堵毋稍疏虞將此由六百里各諭令知之○予甘肅陣亡提督周國勝等祭葬世職○前任雲貴總督吳振械卒予祭葬○癸亥諭軍機大臣等金順奏進規通貴回堡並殲除通昌堡首惡情形一摺河西通昌一堡著名首逆殲戮殆盡著金順會商張曜督飭官軍認真搜捕餘匪務絕根株至回目金萬良來營乞撫該署將軍仍當隨時察看不可墮其詭謀通貴堡回逆始則遣

黨乞撫及令其平牆繳械則又枝梧猶豫其非真心反正已可概見見經金順會商張曜移營進逼該堡卽著激勵將弁乘此聲威迅速進攻埽除醜類不可一意主撫致將來又生反側該逆被剿窮蹙難保不乘間竄出邊外以覓生路著金順與張曜督軍嚴密防維務須就地殲除毋令遠遁他處又貽後患前據福濟等奏平羅銅城堡逆匪勾結陝回千餘欲圖裹糧北竄並著檄令提督劉廷等扼要嚴防截其竄路以免蔓延昨據左宗棠等奏報金積堡業已平毀馬化澂等均經伏誅當此軍威大振之時羣醜自必震懾該署將軍當同心協力將此路殘匪剋日埽蕩以期次第廓清將此由六百里諭令知之○乙丑諭軍機大臣等前因周開錫辦理甘南軍務恐不得力諭令左宗棠隨時查察毋誤事機並令查明鞏秦各屬有無大股賊匪當此北路肅清南路防剿事宜甚關

緊要朝廷實深廬繫近聞河州回匪三千有餘已於去臘潛越洮河竄至岷州與官軍接仗復竄鞏昌阜陽川一路向東分股肆擾距秦州數十里之平南川娘娘壩鹽關李子園等處時有賊馬搶劫殺傷百姓岷州叛勇仍與官軍相持抗未就撫似此情形軍務尙無了日鞏秦爲甘省完善之區前此並未大遭蹂躪乃自周開錫總統南路諸軍旣不能禦外來之匪任其奔突又激變范銘之勇致與官軍爲仇長賊勢倏若不及早廓清又成燎原之患著該大臣乘此北路肅清迅將南路鞏秦一帶悉心布置盡殲醜類范銘見在何處其所帶勇丁有不法者亟應嚴懲有可用者卽應畱以剿賊並非楚勇之外皆爲不可用之勇且楚勇中亦未必無他省勇丁參雜其間所有范銘營勇應如何分別措置之處該大臣當秉公辦理毋得誤聽一面之詞以致債事將此由五百里諭令

知之○諭劉銘傳奏纏金道路隔絕賊勢見在趨重南路仍難分兵請飭定安就近撥隊一摺據稱河州回匪竄至鞏昌阜陽川一路長驅東下分股肆擾秦州境內時有賊馬游掠岷州叛勇雖經議撫抗拒如故若該逆更向東竄唐定奎所部卽須移向汧隴以固陝防此外仍無可撥之兵且纏金距陝甚遠懸軍遠隔轉運艱難見聞河冰已開北路兵力足資展布請飭定安由河防內撥軍駐守纏金或由定安指派段落交該提督撥兵替守以便定安騰出隊伍撥軍赴烏等語南路回匪叛勇接踵紛乘陝防實關緊要劉銘傳所籌各節於接替轉運尙屬相宜卽著定安斟酌情形會商劉銘傳妥籌調派以便薩薩布統帶馬隊迅赴烏城其汧隴一帶防務劉銘傳務當勤加偵探先事豫防毋稍疏忽將此由五百里各諭令知之○丙寅諭內閣前據魁玉張之萬奏審明馬新貽

被刺一案將兇犯張汶詳比照大逆問擬案內人犯分別定擬罪名並請將馬新貽照陣亡例議卹建祠當以案情重大該犯所供各節恐尙有不實不盡特派鄭敦謹前往會同曾國藩再行研究實在情形從嚴懲辦並據給事中劉秉厚等太常寺少卿王家璧先後奏請嚴究主使情節復經諭令鄭敦謹曾國藩等悉心推鞠務得確情以成信讞茲據鄭敦謹曾國藩奏覆審兇犯行刺緣由並無另有主使之人請將該犯仍照原擬罪名比照謀反叛逆凌遲處死並摘心致祭各等語此案兇犯張汶詳以漏網髮逆復押浙江南田海盜因馬新貽在浙江巡撫任內戮伊夥黨甚多又因伊妻羅氏爲吳炳燮誘逃呈控未准審理其在新市鎮私開小押適當馬新貽出示禁止之時心懷忿恨竟敢乘間刺害總督大員實屬罪大惡極既據鄭敦謹等審訊確實驗明兇器亦無藥毒並

無另有主使之人著卽將張汶詳凌遲處死並於馬新貽柩前摘心致祭以彰國法而慰忠魂其子張長幅著照所擬按例懲辦該故督公忠體國歷次勦辦海盜殲除積年匪首地方賴以安靖詎以盜匪遺孽挾仇逞兇倉卒殞命實堪悼惜前已有旨將馬新貽照總督例賜卹入祀賢良祠著再加恩照陣亡例賜卹並於江甯省城建立專祠川示篤念盡臣有加無已至意記名總兵前署督標中軍副將喻吉三武巡捕儘先遊擊葉化龍把總唐得金千總費善樂馬兵冉雄彪等失於防護咎有應得喻吉三著革去提督銜降二級調用葉化龍著降二級調用唐得金等均著斥革以示懲儆○丁卯 上詔 大高殿祈雨○以庫倫援兵中途駝馬疲乏喻福濟等速備臺站支應○庚午諭軍機大臣等本日據恩麟等奏達賴喇嘛由布達拉山親至大招峯經並據聲稱每於藏地

清平按年於正月內循例下山攢招唅經等語前於同治七年正月間經景紋奏稱西藏僧俗人等因豐收安樂懇請達賴喇嘛下山誦經當經降旨賞給哈達等物此次達賴喇嘛唅經虔祝既據奏稱按年於正月內循例下山是否與前案事同一律抑或年例應有之事著恩麟德泰詳悉覆奏並著將從前循例唅經奏案及有無頒賞物件一併查明迅速奏聞將此各諭令知之○辛未諭軍機大臣等張廷岳等奏庫倫前調防兵難以分撥並探聞回匪意圖東犯杜嘎爾奏啟程出口各摺片據稱庫倫爲賊匪所垂涎該處旣無險可憑蒙古兵又不足深恃前調宣化大同官兵二千名俟到庫後設營分防尙恐不足勢難分撥請飭直隸山西各續撥官兵五百名徑赴科布多等語前據李鴻章奏宣化大同官兵兩處分撥統帶之員旣難兼顧分運糧餉又多軫軫業經諭令張

廷岳等將宣化兵畱駐庫倫大同兵撥赴科城茲因庫城兵力不敷若由直晉兩省各行添撥仍恐事涉紛歧不如專由直隸添撥較爲直捷著李鴻章再於直隸所屬各鎮酌調兵一千名派員管帶馳赴庫倫與前調宣化官兵一併聽候張廷岳等調遣其大同官兵一千仍全數調赴科城藉資防守賊匪既已竄至額哲呢河意圖東犯庫倫援軍必須星速前進杜嘎爾見已統帶馬隊啟程著卽趲程前進馳赴哈爾尼敦推河一帶相機防剿所有烏屬臺站福濟等諒已遵奉疊次諭旨趕緊設復不至再有阻滯杜嘎爾既不曉漢文中途遇有緊要應奏事件著准其繕寫清文俟抵烏後一切防剿事宜卽會同福濟等仍用漢字聯銜具奏並著福濟等將摺內陳奏之事用清語向該副都統詳悉告知以免歧異吉林黑龍江馬隊既經陸續出口所有宣化大同官兵著文盛迅速

催調剋期啟程早抵庫城不得稍有延緩將此由六百里各諭令知之○諭文麟景廉奏停止赴烏援軍一摺前因烏科情形較鬆已諭令景廉毋庸帶兵前往至安集延回眾攻破吐魯番城後並未歸順心懷叵測亟應先事籌防著文麟景廉懍遵前旨督飭兵勇於西路各要隘嚴密防守毋稍疏虞東路西甯河州甯夏等處大股逆回接連肅州回匪陸續出關在赤金峽一帶盤踞意圖西竄著成祿迅飭官軍確探賊蹤防剿兼施力扼該逆西趨之路並飭派出之李天和等三營妥籌布置遇賊即擊迅殄逆氛文麟景廉務當飭令防兵相機堵剿毋令匪勢蔓延將此由五百里各諭令知之○癸酉諭軍機大臣等曾璧光奏籌辦黔省軍務調隊助剿請撥協餉一摺曾璧光周達武見在籌商上下游兩路同時進兵上游用兵以萬計下游用兵以二三萬計周達武隨帶原部楚

勇五千九百名並忠字楚勇六百暨募定黔勇共一萬五千再將
本省各軍選留八千擬調李輝武所部二千五百人赴黔令其再
行添募併原部足一萬四千人兼辦上下兩游始敷分布所籌自
係實在情形黔省軍務日久尙無起色總由本省兵力過單以致
此勦彼竄該撫等既擬兼辦兩游籌定進兵之路卽當協力同心
相機調度不可徒託空言李輝武前帶武字營勇三千援陝經蔣
志章抽撥王名涓一營外尙有二千五百人分紮寶雞各路見在
劉銘傳督辦陝西軍務所部不少黔省亟須添兵李輝武所部著
准其調往以厚兵力陝西南路寶雞一帶與甘省秦州屬境毗連
防務甚關緊要著蔣志章劉銘傳會商迅卽撥隊前往填紮該提
督本有移軍前赴汧隴之奏著卽悉心布置毋稍疏虞李輝武所
部俟劉銘傳派隊接防後再行啟程赴黔歸曾璧光節制調遣該

軍向食川餉著崇實吳棠於月協黔餉五萬八千兩外仍將該軍月餉照常籌解毋令缺乏曾璧光等此次籌添兵勇除川省月協的餉及李輝武所部由川給餉外按月尙需餉十四萬兩有餘部撥黔省軍餉每月約計銀十二萬餘兩數尙不敷著戶部酌度情形再於各省加派數萬合舊撥之餉每月湊成銀十四萬兩自本年爲始作爲協黔的餉催令各該省按月撥解赴黔以應急需添兵添餉均已照請辦理務當妥爲部署督軍進剿戡定苗疆黔省見擬分軍兩路進規入寨凱里冀會楚師合剿下游著劉崐檄令席寶田迅督所部掃蕩而前聯絡聲勢不得稍存觀望將此由五百里諭知崇實吳棠蔣志章劉銘傳劉崐曾璧光並傳諭周達武知之○展普濟堂功德林賁賑兩月○乙亥諭軍機大臣等蘇鳳文奏據越南國王來咨都司馬雲標遞到馮子材照會內稱該都

司前往河內購買肉桂等項銀兩被搶欲往清化追究札令派兵護送該都司又欲往河內海陽等省行徑甚爲詭譎並接到廣東陽江鎮照會內敘派李德安等前往該國拏犯又古之人一名偽造札文捏稱前往清查軍情懇請究辦等語都司馬雲標與盜削桂皮之張祿交通欲往該國買桂又以銀兩被搶爲詞意圖詐索情殊可惡馬雲標著卽行革職拏問古之人實在係何姓名僞託清查軍情意欲何爲有無夥黨亦應徹底根究馬雲標古之人均著交蘇鳳文李福泰嚴行審訊從重懲辦張祿亟應飭拏務獲與李四一併訊究馮子材曾否給予馬雲標照會著該提督嚴切根究以期水落石出毋稍含胡廣東陽江鎮照會拏犯一節著瑞麟飭屬嚴拏李德安王景詳到案與陳滄一併究出確情盡法懲治事關交涉外藩瑞麟蘇鳳文李福泰尤當認真查辦不可稍有不

實不盡啟外邦輕視之心至廣東廣西咨行越南文件向有定例
舊知照該國嗣後如有違越向章擅遞公文者卽一面將遞送之
人看押一面咨照該督撫等查辦以杜假冒此外有匪類在該國
境內滋事者立將該犯拏交該督撫從嚴究辦毋稍姑容另片奏
據該國咨稱蘇樞漢等在沿河擾掠等語該國既有匪蹤未可忽
然膜視應否派兵會剿或派員會同該夷官著蘇鳳文李福泰馮
子材會同該國妥爲辦理至蘇樞漢等難保非吳亞終餘黨蘇鳳
文等亦應確切查明不得稍涉回護將此由五百里各諭令知之
○丁丑 上詣 大高殿祈雨○壬午諭軍機大臣等英翰奏拏
獲逆首宋憬詩解省訊供一節宋憬詩在東省倡亂後反覆背叛
久稽顯戮經英翰密派員弁在亳州之界溝集地方將該逆拏獲
卽著英翰將宋憬詩就近在皖正法並傳首犯事地方示眾以申

國憲而快人心此外有無該逆黨與潛圖不軌該撫務當督飭屬員隨時密查以遏亂萌據該逆供稱伊子在西路營中等語宋逆之子如在軍營溷迹必係詭託姓名英翰如能訪明該逆之子蹤迹姓名一面咨照西路各軍營嚴密查拏一面迅速具奏將此由四百里諭令知之○諭豫師奏籌辦西甯軍情等語西甯回眾頻年詭託就撫勾結外匪四處焚殺豫師以兵力不足驟難進攻暫擬鎮攝羈縻解散脅從以孤賊勢所籌尙爲因時制宜之計見在金積堡賊首馬化澂等業已伏誅羣賊自必聞風喪膽左宗棠卽應乘此聲威調派各軍規取河州等處兵貴拙速不貴巧遲諒該大臣全局在胸必已熟思審計迅速籌辦豫師業已函商左宗棠移軍狄河時豫爲分兵西進以便抽軍進紮著左宗棠斟酌情形隨時與豫師妥籌辦理刻下西甯回情漸已斂迹窩藏陝匪亦降

續西竄豫師仍當審度軍情拔隊前進相機剿撫不得徒託空言
久延時日本日據英翰奏拏獲逆首宋憬詩供稱伊子今年二十
歲聽說在西路營裏不知真假等語該逆之子如在軍營潛迹必
係詭託姓名著左宗棠飭令各營留心訪察一經查出卽行奏聞
將此由五百里各諭令知之○癸未諭軍機大臣等金順奏進剿
通貴堡獲勝並攻破洪岡賊寨各摺片通貴回匪恃其堡大濠深
負隅抗拒經金順會同張曜督軍進剿大小十餘戰斃賊千餘名
並將附近之馬陽春寨攻破惟近日該堡人數較多各處洮匪屬
集其中賊勢頗爲猖獗見在甯靈漸次肅清豈可因此一隅久煩
兵力著金順會商張曜一面挑築長圍一面督飭各軍奮力進攻
務將此股回匪就地殲除不得任令他竄又形滋蔓劉廷一軍攻
破洪岡情形與定安前奏大略相同清水渠口兩堡牆濠業經平

毀刻下平羅一帶無餘孽潛藏仍著金順檄令該提督認真搜捕以期一律廓清昨據英翰奏拏獲逆首宋憬詩供稱伊子今年二十歲聽說在西路營裏不知真假等語該逆之子如在軍營湊迹必係詭託姓名著金順知會張曜於所部各營一體留心訪察一經查出卽行奏聞將此由五百里諭令知之○予烏里雅蘇台陣亡防禦阿克棟阿等祭葬世職○乙酉諭軍機大臣等李福泰馮子材奏籌辦越南踞匪分別勦撫各摺片越南匪徒蘇幃漢退出諒山該撫已飭知府徐延旭前往交界處所會同夷官將此股人眾分別去畱或就地安插或遣回本籍約束務當飭令徐延旭妥爲安置毋令再滋事端以安邊徼其占踞木馬高平匪股尙未殲除馮子材見擬統帶防兵十六營馳赴龍州駐紮李福泰派令道員華廷傑赴營幫同辦理勦撫事宜木馬高平接壤鎮安匪蹤

出沒靡常亟應悉數殲除免致侵軼爲患著馮子材相度機宜督同總兵劉玉成迅將木馬一帶股匪蕩平毋畱餘孽並隨時知照該國派兵會剿其各要隘處所該撫已派兵嚴防杜其回竄旁逸之路並於適中扼要地方紮營以防白苗窺伺稽查流民逸匪毋令出關所籌尙爲周密卽著隨時認真防範毋任勾結蔓延至宣光等處既距邊界較遠暫緩進兵亦係實在情形著照該撫等所議俟克復木馬高平後知照該國自行攻剿如該國兵力單弱仍當相機協助以綏藩服不得稍存膜視將此由五百里各諭令知之○諭禁杜爾伯特招墾蒙古旗丁荒地○丁亥諭軍機大臣等李鴻章奏豫籌日本通商事宜請調熟悉洋務大員來津商辦一摺日本通商議約伊始尤應慎之又慎免滋流弊該國使臣約於本年三月間成行輪船迅利不日卽可駛至自應豫行籌畫江蘇

按察使應寶時熟悉洋務著曾國藩張之萬飭令該臬司查探日本使臣過滬卽酌帶委員附搭輪船迅速兼程來津由李鴻章督同該臬司妥籌辦理將此由四百里各諭令知之○戊子諭內閣原任廣東陸路提督劉松山由湖南軍營帶兵轉戰十餘省屢著戰功上年正月因督師進攻甘肅馬五寨回匪中礮陣亡業經降旨優卹見在金積堡賊壘削平首逆就殲該提督靈柩尙未回籍追溯前勲尤深矜惜劉松山著加恩賜祭一壇由左宗棠派員前往致祭用慰忠魂○左宗棠奏范銘部眾挑選成營後餘眾潰變及辦理情形臣已據實詳陳續據提督楊世俊張仲春等報稱該逆自十一月二十二日與官軍接仗後連次衝突均經擊敗擒斬頗多十二月初一初六等日周開錫調赴岷州會剿之涼州鎮總兵傅先宗前臺灣鎮總兵劉明燈等各率所部及臣親軍四哨並

安前宗岳各營先後到岷以岷城東南四五里之教場堡香芳崖地勢高峻俯瞰城中爲賊所必爭非築堅壘偏之不足以制其死命初八日各軍前往修壘楊世俊等料賊必出隊牽掣官軍與張仲春各率馬步列隊護之日午賊果以大股七八千人纔擁出城分而爲兩一支遮截楊世俊張仲春列隊之兵一支直撲劉明燈傅先宗築壘之所各軍屹立靜以待之賊中槍礮雨注呼噪甚急楊世俊劉明燈傅先宗俟其逼近揚旗伐鼓各軍如牆而進槍礮矛刺擒斬二三百名賊勢披靡官軍縱馬蹙踏步隊繼至銳氣百倍圍賊東南川中刀砍矛刺擒斬三四百名傷者無數敗賊負創狂奔入城日暮收隊官軍亦略有傷亡自是賊勢愈衰衆人乞撫日三數輩然首逆畏誅並無一自縛來投者官軍更番攻擊炸彈所及樓堞多圯城中糧食且盡殺馬充飢每夜出攻堡覓食官軍

屢邀擊之無所掠正月初八日大股賊自西門突出掠糧官軍伏於後根堡要其歸路賊至伏起陣斬悍目師仲延潘榮華等城中復出援賊三千餘迎戰傅先宗與提督殷華廷馬步各營馳截之斬馘千餘擒其悍目楊朶會尤得祥援賊大潰劫糧之賊亦大潰斬馘無算餘賊駭走劉明燈察知賊勢困蹙已極必尋隙突竄乃撥馬步四面加緊圍逼適湯聘珍奉周錫檄帶前由范營分出之平西營營官鄭福及差弁韋廷苞於十一日到岷鄭福韋廷苞均狄河人也令其入城諭潰卒毋相隨受戮諸潰卒涕泣聽命十二日二鼓潰卒頭目胡海包天成等隻身詣營乞撫並請先質妻子十四日潰眾齊出乞撫傅先宗楊世俊劉明燈張仲春殷華廷慰諭之令胡海包天成等呼首逆尤芝政安桐貞速出尤芝政安桐貞見撫局已定十五日乃挺身詣營謝罪傅先宗等傳集各降

目數尤芝政安桐貞倡亂抗拒之罪斬之以徇餘眾震懾帖服乃散粟賑飢軍挑其壯健者分置各軍周開錫檄劉明燈編立副中一營臣親軍四哨編增四營外尙有三千餘人歸傳先宗殷華廷編營安插並填補缺額其老弱婦女萬餘則安置岷州檄張仲春帶宗岳三營副白旗馬隊營鎮撫之檄署知州呂恕編審安插給以賑糧種子督其耕作而黑頭勇大股多寡強弱始有確數可稽卽范銘前此所收之蘭州叛兵各處潰勇土匪及尤芝政等此次裹脅之難民附和之游勇亦水落石出可以逐一清釐矣岷州紳民張旋乾邱映斗王映奎白生彩等數十名老民數百名訴稱自前任徐楊知州招收黑頭勇日久嘯聚愈眾始而攔路劫搶繼而攻堡殺人比賊尤甚近破后所小山香房崖卧竜哈樹板達口麗家山北小路甘寨野倉永兒壩等寨請乘此兵威一鼓殲除周開

錫諭以首惡既誅悍黨多就駢戮餘當曲貸以廣 皇仁仍慮土
客仇衅既深勢難並處分檄劉明燈傳先宗殷華廷等各帶所編
各營新收叛卒赴隴西伏羌秦安駐紮慎選營官哨官訓練鈴束
以期得力臣飭其清查各案叛弁匪目及各省游勇漸次分別辦
理冀可銷異患以固民心又奏本月十二日欽奉同治十年二
月初五日寄諭前因周開錫辦理甘南軍務恐不得力諭令左宗棠
隨時查察毋誤事機等因欽此跪讀之下曷勝惶悚臣任大責重
不能早紓西顧之憂並以引用非才致煩 聖慮愧歎何言惟事
關大局知而不言既乖人臣無隱之誼而言之過盡又適開議論
之端晝夜思維罔知所措謹就所見所聞事堪覆按者爲我 皇
上陳之諭旨河州回逆三千有餘於去臘潛越洮河竄至岷州與
官軍接仗復竄鞏昌阜陽川一路向東分股肆擾平南川一節臣

徧聞鞏秦各府州縣去臘稟報實無河州回眾三千餘潛越洮河

關入鞏秦與官軍接仗之事惟狄道曾有河回出擾經河州鎮總

兵王得勝兩次出隊旋即卻走略有擒斬臣以無關輕重未及敘

奏言者所稱與官軍接仗或即指此然不獨未竄至岷州亦未竄

至鞏昌也至阜陽川平南川娘娘壩鹽關李子園等處地當鞏秦

之交去洮益遠從前狄道未復以前時有河回竄擾蓋洮東無軍

駐守賊無所忌耳迨狄道既復屏蔽稍寬鞏郡迤南防軍林立洮

河之可偷渡者惟康家巖一處故安定會甯時有零騎竄越滋擾

臣曾參革帶勇道員李耀南而不効鞏秦諸將者以此言者誤信

一時謠傳遽以無據之詞入告此臣所不及料也范銘皋蘭人所

部黑頭勇多河州狄道人甘肅官紳以其與河回仇怨素深冀其

能出死力與河回抗而黑頭勇在甘軍中猶爲出色前藩司林之

望力庇之任其展轉招致不加譏察卒之冗雜日甚夏楮雜糅愈不能戰而餉既乏絕派捐民糧又以時被河回驚擾人民死喪流亡地畝荒蕪無以供億遂棄所駐之地就食岷州穆圖善規復河州徵南路諸軍由狄道進剿初猶屢獲小捷繼藉口糧盡退走鞏秦敗不可止據梅開泰王得勝等稱當時實因黑頭勇先潰牽動各軍其詳固無從稽考然范銘全軍潰退則固無可辨也臣度隴之初見隴事敗壞至極無從措手心竊憂之然兵事有緩急賊勢有重輕自應悉心斟酌遂決意取遠勢進兵北路就近援南路而自率親兵駐中路以策應南北兩路惟南路諸軍本不足恃又挫退之後銳氣銷亡欲從新布署既苦欠餉過久撤遣無資且甘軍土客混雜其土著固有室家之戀其客兵亦皆娶婦生兒軍營惡習無所不有縱籌撤遣之資必將到手花銷仍羈異鄉流爲游手

貽地方異日之患適周開錫由閩解餉來營見臣當食而歎遂自請赴南路一行臣乃令其統所撥宗岳全軍平江兩營點驗甘南各軍截汰虛額成營併歸總統兼理地方釐稅錢糧諸務剔除中飽以蘇民困而濬餉源其閒驕軍悍卒之鬪陵同事之牽掣皆所不免而周開錫守意自如中無所懾乃復渭源狄道開屯田勸耕墾減陋規定津貼鞏秦之閒民用大和臣近接秦州士民畱見署鞏昌知府之稟雖無歌誦周開錫之詞而所稱德政則皆周開錫所稟呈施措者民情亦大可見矣言者謂鞏秦爲完善之區前此並未遭蹂躪自周開錫總統南路諸軍以來既不能禦外來之匪又激變范銘之勇致與官軍爲仇長賊勢餒臣未見原奏不敢多辨然南路軍務地方已有起色臣疊次所奏甚詳范銘之變非由周開錫激成難逃聖明洞鑒是非仍可覆按也軍中謠言最多

鞏秦文武畏黑頭勇尤甚潰卒東竄之時號稱十數萬風謠四起
比楊世俊追勦疊勝人心稍定而追過禮縣時署知縣蕭肇基運
糧不及捏報楊世俊被賊截圍數段臣知其誣撤委迫楊世俊躡
追至岷以銳進猛攻爲賊所乘致挫羣謠復作周開錫堅持不動
比楊世俊傳先宗劉明燈報臘八之捷微及撫局臣批示勦到極
處乃可言撫自首惡伏誅叛卒分起安插而羣詠亦漸息見在范
銘眷屬猶在蘭州應領糧食仍照常給領臣前奏范銘棄軍走匿
其下潰變或非其意所及惟尤芝政安桐貞罪在不赦應勦撫兼
施迅圖戢事茲局勢初定范銘知臣與周開錫無意殺之或赴蘭
州自投亦未可定惟頃接見蘭州道張瑞珍坐補漢中知府林士
班自秦州來談及范銘一事據稱范軍未潰之先曾問范銘自言
伊在皖帶兵曾接護前撫翁同書親屬有功又素稱林士班爲太

世叔以其爲林之望堂叔也或請旨飭下陝西撫臣蔣志章委藩

司翁同儕督辦陝西軍務臣劉銘傳委前藩司林之望前赴秦州

會同鞏秦階道唐啟蔭查明地方實在情形及周開錫辦理此案

有無激變情事以明國是而釋羣疑可否之處伏候聖裁至甘

肅之有楚軍自都興阿多隆阿由湖北帶來內多湖北投誠之眾

嗣楊岳斌總督陝甘則湖南水軍居多而皆名爲楚軍故蘭州歷

設有楚軍糧臺不自臣始也臣軍雖名楚軍而陸續選募各省勇

丁頗多本不僅楚人臣於楚軍固無所庸其徇庇又奏臣欽奉恩

旨開復降三級畱任處分並加賞一騎都尉世職跪聆之下感激

涕零不知所措竊念臣楚南下士章句陋儒蒙文宗顯皇帝特

達恩知於疑謗交集時優擢京卿畀以幫辦軍務重任皇上御

極疊承寵渥游擢疆圻並荷甄及微勞錫封伯爵臣拜官不敢辭

而受爵不敢不辭者竊謂官者責以理人治事實心實力敬慎以圖凡愚尙能自勉至於爵賞則必功著當時名垂後世而後足以副茲曠典而無忝竊之議古人每以受爵不讓爲深戒暴得大名爲不祥者非無見也乃再辭未蒙俞允至今每署銜名猶深祇懼茲因巨憝伏誅復荷芝綸蠲其夙眚恩施下逮實已至優極渥無可復加若復覲承殊眷再叨世職之封臣無橫草之功而受賞緊附分茅之後實覺愧負前驅將士無以策後效而勵將來伏念陣亡提督劉松山自秦晉轉戰燕齊返旆以來復踰千數百里淨埽十數萬匪徒力攻四百餘賊窟英銳忠勇絕少比倫不幸倉卒爲飛礮所中垂危之際猶以金積未平屬所部努力報國語不及私並飭其姪錦棠將遺骸藁葬吳忠堡必俟事平始歸骨先隴昨金積既平劉錦棠按得當時謀害劉松山逆賊馬八條極刑處死瀝

血以祭劉松山之靈三軍雨泣

臣

提訊解到金積堡同眾均稱劉

帥亡後堡中夜靜時聞戈馬之聲如怒潮湧至每月約三四次或

五六次賊中每疑官軍夜襲不敢解衣就臥而上年十一月十六

夜三鼓平涼城外忽聞大聲鳴鳴山谷響應守城將士疑爲狼嗥

開礮轟擊之比縋城出視了無所見

臣

時徘徊帳中覺其有異後

得諸軍馳報是日馬化澂就擒矣然則前史所載毅魄忠魂時露

靈異誠未得謂其盡屬虛語也

臣

與劉松山共事數年知其行軍

律已實一時名將而一片忠愛之忱出於至性則古人實無以加

每一追思悲痛不能自己合無仰懇

天恩將賞加

微臣

騎都尉

世職合之劉松山原得之三等輕車都尉照三河殉難撫

臣

李續賓例追賞劉松山令其嗣子肅承襲則盛典不虛前敵諸軍益知

所感而

微臣

亦免忝竊之譏感荷

鴻慈曷其有極

上諭軍機

大臣等左宗棠奏南路官軍勦辦潰卒獲勝一摺范銘所部潰勇叛踞岷州經總兵傅先宗等督軍進勦獲勝擒斬逆首尤芝政等餘眾就撫業經散粟賑濟挑留壯健分置各軍編營安插其老弱婦女萬餘安置岷州給以籽糧督令耕作籌辦尙爲周妥此起潰勇人數龐雜前曾有焚掠劫搶之事該大臣慮其土客尋仇已將新收叛卒分別飭赴隴西伏羌秦安駐紮勤加訓練著嚴飭各營妥爲鈴束毋令再生事端范銘所部該大臣已逐一清釐其另案叛弁匪目及各省游勇尙恐隨處溷迹仍當檄令周開錫認真清查漸次辦理以靖南路而遏亂萌此次各軍勦撫潰卒著有微勞及去冬攻堅陣亡將士准由左宗棠分別奏請獎卹另片奏覆陳周開錫並無激變貽誤情形等語南路軍務旣據該大臣查明詳細陳奏足紓廑繫所請飭令蔣志章等派員前赴秦州之處著毋

庸議周開錫既能任事不避嫌怨所有甘南軍務及地方釐稅錢糧已責成該道經理該大臣當飭周開錫聯絡各營及地方官和衷商辦不得一意孤行如有貽誤惟周開錫是問范銘見在是否投出仍著查明具奏另摺奏請將所得加賞世職追獎勞臣等語劉松山屢著奇功歿於王事朝廷軫惜殊深本日已明降諭旨賜祭一壇以慰忠魂俟甘省軍務一律肅清屆時再降恩旨該大臣請將加賞騎都尉世職追賞劉松山令其嗣子承襲之處著毋庸議將此由五百里諭令知之○諭崇實吳棠奏巴夷竄擾經川滇兩軍擊退回巢一摺雲南之大關永善四川之雷波馬邊夷巢林立聲息相通此次滇匪句串巴夷散練分股竄擾雖經川滇兩軍夾擊潰竄回巢惟尚有零匪數百藏匿老山且該夷不務耕耘專圖劫奪難保不暗中勾合乘間復出著崇實吳棠劉嶽昭岑毓英

督飭唐友耕李家福兩軍在川滇毗連一帶實力防剿將老山匿
匪搜捕淨盡毋得稍分畛域其筠連縣地方游匪數十成羣乘機
搶奪若不上緊拏辦尤恐釀成大患崇實等務當嚴飭唐友耕會
合附近兵練併力掃除以清餘孽將此由五百里各諭令知之○
命瑞常爲大學士由刑部尙書遷以文祥協辦大學士○左宗棠奏臣前
將金積堡首逆馬化澂暨馬耀邦馬建邦馬正邦馬九馬三馬成
澂馬恆邦馬定邦等凌遲處死並將從逆要犯概予誅夷各情於
同治十年正月二十五日由驛馳報在案嗣復派員將逆屬馬玉
澂馬五十六馬五十九馬樹邦馬彥邦馬繼邦馬三和馬飛飛馬
化澂馬進孝馬由宗馬鎖馬沙杷馬七十子馬啞啞馬阿西子等
男犯十六名口馬馬氏馬譚氏馬閻氏馬何氏馬毛抓抓馬毛亞
亞馬三苗七名口又雇工牛占元楊阿壯子等二十六名口僕婦

使女等九名口一併提至平涼委員審取確供臣覆加研訊馬玉
澹卽馬七係首逆馬化澹堂弟前經手繳過槍礮係購自陝回均
不堪用並據雇工及其親屬等供該犯曾與馬化澹經管槍礮等
項眾證確鑿應按照共謀反逆凌遲處死例凌遲處死雇工牛占
元牛占寬本黑龍江回民據供在馬化澹家受僱已十餘年往來
包頭等處領本置貨同治七年官軍進剿該犯卽在金積堡並未
外出其同謀抗拒可知應卽斬決比提馬玉澹牛占元牛占寬辦
結外其馬五十六係馬耀邦之子馬五十九係馬樹邦之子馬樹
邦係馬九之子馬彥邦係馬三之子馬飛飛係馬成澹之子馬由
宗馬鎖馬沙杷馬七十子係馬定邦之子馬繼邦馬三和係馬玉
澹之子均年未成丁訊明不知謀逆情事應照反逆案內問擬凌
遲之犯其子訊明實係不知謀逆情事者無論已未成丁均解交

內務府閹割發往新疆等給官兵爲奴例解交內務府照例辦理
馬五十六馬五十九馬飛飛馬由宗馬鎖馬沙杷馬七十子馬三
和俱年在十歲以下應照例牢固監禁俟年十一歲時再行解交
內務府照例辦理馬化瀾卽馬九期服兄又馬定邦之父馬阿西
子係馬九已死期服兄馬化椿之子馬進孝馬啞啞係已死馬定
邦期服兄馬安邦之子應照緣坐男犯並非逆犯子孫例發往新
疆等處給官兵爲奴馬阿西子馬啞啞見今年在十五歲以下應
牢固監禁俟成丁時再行發遣查新章發新疆之犯俱改發黑龍
江惟見據賊供黑龍江亦有新教之黨在彼傳教應改發閩廣給
官兵爲奴至女犯馬馬氏係馬化瀾之妻馬譚氏係馬正邦之妻
馬閻氏係馬正邦之妾馬何氏係馬建邦之妻馬毛抓抓馬毛亞
亞係馬化瀾之女俱應緣坐應照嘉慶十九年山東反逆案發閩

粵等省駐防爲奴除馬馬氏業據報病故驗埋應毋庸議外其馬
閻氏之女馬三苗例無緣坐明文應准該犯婦帶赴遣所馬化澹
之女馬毛抓抓馬毛亞亞俱年幼應暫行收養俟及歲時再行發
遣其訊無從逆之雇工僕婦使女等均發交平涼縣安插擇配是
否如斯應請旨飭部覈覆遵辦再平涼縣監獄偏仄所有應行監
禁收養男女各犯擬發交陝西按察使衙門分別辦理又奏巨逆
穆生花卽穆三其祖穆大阿渾傳習新教與馬化澹之父馬二交
好新教中推爲大善人穆大阿渾臨死以其帶服白帽紅衣傳之
馬化澹令其眾歸馬化澹管束穆生花與其弟穆四穆五均爲新
教阿渾行教於秦安清水交界之蓮花城一帶與馬化澹互相首
尾馬化澹噉其攻陷平涼府城固原州城其陷城也屠戕民人慘
酷殊甚平涼爲甘肅中路大郡承平時城內外煙戶不止數萬亂

後僅存有四十七戶男女丁口不滿七百縱橫數百里煙火寂然而白骨黃茅彌望皆是遺黎泣訴被禍之烈爲古今所未有也穆生花與其弟兄夥黨旋遷居金積堡助馬化隆抗拒大兵上年五月穆生花以求撫未得知罪無可逃仰藥自盡金積堡平後陳湜黃鼎按獲穆玉軍前正法解其眷口夥黨赴平涼平固民人以穆生花兄弟實逆案渠魁其眷口夥黨呈請按律擬坐臣擬俟其解齊另案分別擬辦以昭炯戒而快人心又奏據陳湜等稟解王錫爵鐵秉忠袁世榮三犯到營臣親加提訊據王錫爵供稱雲南崇自縣回民由武進士花翎侍衛報捐都司分發甘肅隨征立功保升花翎遊擊前陝甘總督樂斌委署花馬池營參將同治元年經甯夏鎮派令帶兵一千名赴陝防堵在北關外偵探賊蹤卽同所帶回兵數名投入陝回鄒保和賊營七年四月同陝回到董志原

其眷口在花馬池者先已移至金積堡該犯遂入金積堡同住據
鐵秉忠供陝西長安縣回民由行伍出征歷保藍翎都司銜守備
前護陝甘總督恩麟委護靈州營參將同治八年十一月馬化澂
遣逆黨襲陷靈州城該犯投賊攜眷移住金積堡據袁世榮供陝
西鳳翔縣回民由行伍出征歷保花翎都司銜守備署陝西甄平
營都司同治七年挈眷投賊移住金積堡臣查王錫爵鐵秉忠袁
世榮均係從逆武職王錫爵並以女嫁馬化澂之孫爲妻訊各賊
供當官軍進攻金積堡時王錫爵袁世榮與首逆馬化澂之子元
惡馬耀邦分守西南北各城抗拒官軍最爲盡力尤屬罪大惡極
覆載難容臣於研訊明確後卽將王錫爵鐵秉忠袁世榮三犯一
併凌遲處死以昭炯戒報聞○己丑 上詣 大高殿祈雨○庚
寅調全慶爲刑部尚書存誠爲禮部尚書崇綸爲工部尚書以靈

桂爲理藩院尙書早保爲左都御史魁齡爲吏部左侍郎轉延煦
爲戶部左侍郎調桂清爲戶部右侍郎恩承爲禮部右侍郎轉明
善爲工部左侍郎以榮祿爲工部右侍郎由鑲黃旗蒙古副都統遷○是月獨
緩直隸磁州等二十七州縣被擾節年額賦江蘇泰州等二十五
州廳縣暨淮安等四衛被水被旱上年漕糧額賦太倉等二十九
州廳縣暨蘇州等五衛被旱節年民欠租賦

三月癸巳諭軍機大臣等定安金順奏攻克通貴堡擒獲首逆馬
萬選並辦理餘匪情形一摺通貴堡大小兩寨巢穴賊悍日久負
隅經金順會同張曜督率官軍奮勇進剿攻克巨巢生擒首逆實
足以寒賊膽而快人心惟敗逃餘匪乘閒竄入納家牐內該處匪
類納萬郭等復以洗回之說煽惑羣情若遽行進兵則已撫良回
勢必驚擾適墮納萬郭等詭謀金順見商張曜飭令該處良回速

將藏匿匪眾及頑梗不化之徒勒限悉數驅出就戮以免株連所
籌尙合機宜卽著該署將軍等妥爲辦理如果有意窩藏自外生
成卽著金順會同張曜督兵進剿毋令滋蔓金順張曜所部攻堅
破壘勞瘁異常俟甯夏一帶肅清卽可略予休息以養兵力該處
有無零星回堡需兵剿辦並著定安金順查明具奏將此由五百
里各諭令知之○予甘肅陣亡副將傅守異祭葬世職○丙申諭
軍機大臣等岑毓英奏攻克澂江府城擒斬首要各逆並克復江
那土城各摺片澂江府城被賊占踞十有餘年此次經岑毓英督
率各營員弁奪據四面城濠分投開挖地道疊次環攻於二月初
一日將澂江府城攻克生擒首逆馬和等正法敗逃餘匪搜殺殆
盡全境一律肅清實足以申天討而快人心岑毓英督兵剿賊親
臨前敵克奏膚功實堪嘉尙其在事出力文武員弁卽著劉嶽昭

岑毓英查明保奏候旨施恩至開化府屬之江那地方久爲賊匪
堅巢經署總兵麟志等軍先將探南腳側竜二處攻克斷其犄角
乘勝力拔江那剿辦尙屬得手卽著劉嶽昭岑毓英檄飭張保和
等迅將田心茂克賊巢一律攻拔毋稍稽遲見在滇省東南各屬
漸次底定此後進兵機宜及如何規復大理之處並著劉嶽昭岑
毓英斟酌情形次第籌辦岑毓英另片奏參將邵天貴等燒殺搶
擄目無法紀已查拏正法等語軍行以紀律爲先騷擾在所必禁
嗣後如有似此不法之員並著該督撫等一體嚴懲以肅軍律將
此由六百里各諭令知之○以流民赴朝鮮滋擾諭都興阿丁寶
楨於沿海地方飭屬嚴密查禁○張兆棟奏挑築運河事宜允之
○丁酉諭軍機大臣等福濟等奏拏獲賊探飭屬嚴防何璟奏烏
屬各臺未齊大同兵候調前進各等語賊匪伺隙回竄本在意中

見據福濟等拏獲賊探據供教成娃子賊中分遣細作陸續赴烏城庫倫放探並有賊股在各旗地界藏匿行走鄂哲尼河等處又有賊股盤踞約定三月間在雪山溝會齊四月間向東北來烏滋擾圖上庫倫並調施元帥帶馬隊二千出口謀犯庫倫賊情叵測亟宜先事豫防著福濟榮全錦丕勒多爾濟張廷岳阿爾塔什達各飭所屬扼要嚴防斷賊來路一面勤加偵探將各起細作按名按拏毋任溷迹賊既圖犯烏庫乘其黨與未集先發制之則烏合之眾不難盡數殲除著杜嘎爾迅卽督兵前進探蹤雕剿毋任醜類蔓延福濟張廷岳等當各就見有兵力防剿兼籌彼此隨時知照互相聯絡不得稍涉大意福濟等原片著鈔給張廷岳等閱看烏屬各臺疊經諭令福濟等一律設復乃日久尙未備齊以致師行多滯實屬疲玩大同官兵改調赴科應由賽爾烏蘇轉西行走

文盛因烏屬各臺未齊令該官兵暫緩來口駐紮天鎮候調俟宣
化兵全過後再行前進究竟烏屬各臺駝馬何時可以備齊宣化
官兵何時全過著文盛福濟等妥速應付毋再稽延杜嘎爾亦應
遵奉疊次諭旨會商福濟等設法辦理以便迅速前進福濟等卽
將各臺備齊由文盛就近飭令大同官兵接續進發星速赴科轉
餉旣由貢果爾一手經理晉省卽毋須派員出口其由歸化購糧
及運赴察哈爾臺站事宜仍著何璟會商定安妥爲籌辦毋令兵
食缺乏福濟等另摺奏請將捐輸踊躍之蒙古王公等獎勵等語
業已照請將車林頓多布賞穿黃馬褂餘令該衙門議給獎敘矣
卽著該將軍等傳知該王公率屬守禦共衛邊疆力圖報效將此
由六百里各諭令知之○戊戌予甘肅陣亡副都統善山保等祭
葬世職○增建江甯駐防官署兵房○己亥 上詣 大高殿祈

雨○辛丑諭軍機大臣等甘肅金積堡賊巢業經官軍平毀逆首馬化澂等伏誅經左宗棠審明該逆首等眷屬按律分別科罪請將馬化澂馬阿西子馬進孝馬啞啞發往新疆等處給官兵爲奴按照新章俱應改發黑龍江據該督奏訊據賊供黑龍江近亦有新教之黨在彼傳教應改發閩廣給官兵爲奴等語回民勦立新教結黨自固恐非安分之徒黑龍江地方是否有此名目有此黨類曾否在該地方滋事著德英不動聲色密訪明確詳細具奏如無滋事情形自應一視同仁毋令該回民等稍生疑懼轉啟釁端此事並非令該將軍查辦萬不可稍涉張皇將此密諭知之尋奏遵查黑龍江回民尙屬安分守法並無新教結黨滋事報聞○丙午兩廣總督瑞麟奏欽州轄境與越南國屬狗頭山等處毗連時有匪徒窺伺洋面見飭副將雷秉剛管帶輪船會剿斃匪多名得

旨仍著嚴飭派出文武各員弁會同巡洋舟師實力查拏毋任漏網以靖海疆○丁未 上詣 大高殿祈雨○戊申吏部以大學士倭仁瑞常應定何殿閣請得旨倭仁著授爲文華殿大學士瑞常著授爲文淵閣大學士○庚戌雨○以四川官軍攻克雲南永北廳城出力予副將鄧全勝等以總兵官簡放賞土司安平康祖父母父母二品封典餘加銜升敘有差○辛亥曾國藩等奏籌廣德等處招墾事宜詔如所議行○浙江孝豐縣土匪滋事竄建平安徽官兵擊破之○丁巳定安等奏籌轉運軍糧章程詔如所議行○戊午諭軍機大臣等李福泰奏剿除賓州貴縣賊巢等語匪首廖八占踞賓州下周村地方日久稽誅經副將潘其泰等帶兵進剿破其巢穴該匪率黨逃出旋經兵練擊斃客匪張平義等分踞遷江縣之白鶴村貴縣之松柏村恃險負隅亦經知府固魯鏗

等督率兵勇分投圍攻當將張平義等擒獲正法兩村匪巢同時
攻克辦理尙爲妥協惟潰逃餘匪難保不勾結黨與復滋事端李
福泰督飭潯州府知府將貴縣土客各案認真清理並分督兵勇
搜捕餘黨以清餘孽前據蘇鳳文奏咨商馮子材於入關後挑畱
十二營撥赴南太鎮安思恩各府與原派之勇協力清除伏莽仍
著李福泰酌度情形督飭所屬文武實力籌辦以期地方一律肅
清將此諭令知之○以甘肅克復狄道州城出力賞副將李忠林
等巴圖魯名號餘加銜升敘開復有差○己未以孟夏時享太
廟上前期親詣行禮